

四庫全書

史部

欽定四庫全書

唐大詔令集卷七十三

宋 宋敏求 編

典禮

東郊

親祀東郊德音

北郊

太極元年北郊赦

明堂

詳議明堂制度詔

頒明堂制度詔

親享明堂制

明堂災告廟制

親祀明堂赦

社稷

親祀太社詔

昇社稷及日月五星為大祀勅

東郊

親祀東郊德音

皇王之化載籍所陳將奉天而育物必順時而行教雖
禮文則著而親祠蓋闕朕自膺寶歷且踰二紀承宗社
之蕃祉因公卿之叶心萬物阜成庶務簡易思以黎獻
臻夫仁壽是用敦本復古將必稽於月令謀始作則先
有事於春郊宜因展禮之辰式布維新之澤其天下見

禁囚應死罪者特宜免死配流嶺南以下罪並放免朕
每念黎民敝於征戍親戚多別離之怨關山有往復之
勤何嘗不惻隱於懷寤寐增歎所以別遣召募以實邊
軍錫其厚賞使令長往今諸軍所召人數尚足在於中
夏自能罷兵既亡金革之事足保農桑之業自今以後
諸軍兵健並宜停遣其現鎮兵並一切放還京圻之內
雜役殷繁言念勛勞豈忘優恤頃者櫟陽等縣地多鹹
鹵人力不及便至荒廢近者開決皆生稻苗亦既成功

豈專其利京兆府界內應新備田並宜散給貧下及逃
還百姓以為永業書不云乎不作無益害有益語不云
乎奢則不遜儉則固緬惟前古常切在心將斲雕以為
樸期上行而下效自今以後王公並不得以珍物進獻
所司應緣宮室修造務從節儉但蔽風雨勿尚華飾至
如金玉器物諸色雕鏤朕緣蕃客所要將充宴賞今流
俗之間遞相倣效既捐財於無窮仍作巧以相矜敗
俗傷農莫斯為甚並一切禁斷以絕浮華古者鄉有序

黨有塾將以弘長儒教誘進學徒化人成俗率由於是斯道久廢朕用憫焉宜令天下州縣每一鄉之內皆別置各學仍擇師資令其教授其諸州鄉貢進士每年引見訖並令就國子監謁先師所司設食學官等為之開講質問疑義且公侯之肩皆稟義方學禮聞詩不應失墜容其微幸是長慢遊如聞近來弘文館學士緣是貴胄子孫多有專經業便與及第深謂不然自今以後宜一依式令考試朕之爵位惟待賢能雖選士命官則有常

條而安卑遁跡尚慮遺才其內外八品以上官及草澤
官有學業精博蔚為儒首文詞雅麗通於政術為衆所
推者各委本州本司長官精加搜擇具以聞奏發生之
月實在於行仁利物之心莫先於作善先斷捕獵令式
有文所由州縣宜嚴加禁止其每年千秋節日仍不得
輒有屠宰道釋二門皆為聖教義歸弘濟理在尊崇其
天下觀寺有絕無女道士僧尼者宜量觀寺大小度六
七人間擇灼然有經業戒行為鄉閭所推仍先取年高

者凡百卿士朕之同德宜勉修所職以合時令禮有
施惠義兼行賞實為其時固不可缺亞獻忠王璵宜賜
物一千疋終獻潁王璵賜物五百疋邠王守禮寧王憲
各五百疋慶王悰以下及長公主郡縣主二王後京文
武官賜帛各有差天下諸州侍老宜令所由長官量賜
酒肉務在優養今朝廷無事天下太和美景良辰百官
等任追勝為樂宜即布中外咸使聞知

開元二十
六年正月

北郊

太極元年北郊赦

門下朕聞大事在祀禮極乎郊丘大道日生道存乎赦
宥故至誠斯感允接神明之休盛典聿修必敷雷雨之
施古先帝代躬祀后土所以崇兼載之功配博臨之義
有虞氏之合禘徧於山川成周氏之從祀逮於林澤西
漢汾陰之睢東洛翠媯之畢雖制未備而道極可觀曹
馬以還數百餘載蓋設儀而不復或誠信而未孚有廢
祀莫能得舉我國家受命也承百王之季啟三統之元

高祖神堯皇帝膺籙受圖繼天立極太宗文皇帝弔
人伐罪南征北怨是用拯生靈於塗炭登物類於休和
高宗天皇大皇帝惟睿作聖垂衣而理大聖天后受託
從權當宇而化中宗孝和皇帝允恭克讓守文御武能
致刑措於變時雍朕以渺身恭荷丕構常恐政理乖中
風雨愆期惕厲周於萬戶疚懷切於一物幸乾坤交泰
宗社降靈氣無疵癘之災物遂生成之性呼韓慕化侍
子來庭月支請職名王入貢大荒同軌瀛海無波俯循

涼德載懷寅畏故以歲首肅事裡宗爰撰令辰親祀方
澤採黃圖之舊制定黑時之前基心謀取則於禮經宥
密同規於詩頌三祖登配羣望畢從咸池之舞在列合
鍾之管斯應祥風入候當乎八變之殷瑞日揚暉屬乎
三獻之始臣工助而胥悅兆庶觀以相趨誠敬克申感
慶交集頃緣郊籍已肆眚災貸宥之道未應累降但精
享云缺既曠代而方循福釐所被思寰宇之同沐宜因
大典式暢洪恩可大赦天下改太極元年為延和元年

五月十三日昧爽以前大辟罪以下咸赦除之其十惡及劉誠之胡太宰徒侶官人受贓並不在赦限文武官預大禮各賜勲一轉桓彥範敬暉崔玄袁恕張柬之等特還其子孫實封二百戶大酺五日

明堂

詳議明堂制度詔

朕聞合宮靈府創鴻規於上代太室總章標茂軌於中葉雖復質文殊制奢儉異時然其立大中作人極布政

施教歸之一揆朕嗣膺下武丕承上烈思所以答眷上
靈事遵孝養而法宮曠祀明堂寢構永言大禮朕甚懼
焉宜命所司與禮學士等考覈故事詳議得失務依典
禮造立明堂庶曠代闕文獲申於茲日因心展敬永垂於後昆
其明堂制度宜令諸曹尚書及左右丞詳議

頌明堂制度詔

首出萬物實顯崇高之模德普八方乃睹昇平之盛合
宮聽朔闡黃軒之茂範靈符通神敷帝勛之景化殷人

陽館青珪備禮姬氏玄堂彤璋合獻雖運殊麗翰時變
質文至於立大中建皇極軌物施教其歸一揆洎乎西
京創厯駁政逾繁東漢開基舊章猶闕考圖汶上僅存
公玉之儀度室圭躔纔紀中元之製三方鼎據祚傾於
金馬五胡塵擾道喪於蒼鵠自此相仍時經板蕩遂使
陟配之典久淪於縣載端宸之化允屬於隆平朕恭膺
寶命肅奉瑤圖昧旦求衣景影忘食賴上玄垂祐宗社
降靈幽明宅心中外禔福封金岱嶺昭累聖之鴻勳勒石

九都成文考之先志功標偃革時會委裘固可以作化明
堂顯榮太室修機之厯既表於嘉明布政之宮式崇於
美制是用求中景日取則陰陽考廣袤於裁主定高卑
於置桷傍羅八柱周建四墉架宇儀天疏基象地窻闥
齊應路並興導壁水以環階應璇衡而結極重阿複道
用循測管之模上圓下方仍准分著之數木工不琢土
事無文豐約折衷經始勿亟勾芒候序入春圃而司儀
蓐收屆時下秋園而奉職事符神道鉤繩之用畢陳儀

叶子來釁落之期非遠將以肅清禋祀展殷薦於皇靈施
號法宮揚休聲於大帝百神受贄咸尊孝享之風萬國
來庭共覩太平之政闕文斯備大禮聿修制作之規可依別
勅宜頒示天下永垂來葉

親享明堂制

昔軒黃御歷朝萬國於合宮丹陵握符咨四岳於衢室
有虞輯瑞總章之號既存大禹錫圭重室之名攸建殷
人受命置陽館以辨方周室凝圖立明堂以經野用能

範圍三極幽贊五神展尊祖之懷申宗祀之典爰從漢
魏迨及周隋經始之制雖興修廣之規未備朕以庸昧
虔膺厚託受寄於綴衣之夕荷顧於仍几之前伏以高宗
往年已屬意於陽館故宗輔之縣預紀明堂之名改元
之期先著總章之號朕於乾封之際已奉表上陳簡在宸
心未遑營構今以鼎郊勝壤圭邑名區處天地之中順
陰陽之序舟車是輶貢賦攸均爰藉子來之功式遵奉
先之旨夫明堂者天子宗祀之所朝諸侯之位也開乾

坤之興策法氣象之運行故能使災害不生禍亂不作
眷言是烈豈不美歟比者鴻儒禮官所執各異咸以為
明堂者置三里之外七里之內在國陽明之地今既俯
邇宮掖恐黷靈祇誠乃布政之居未為宗祀之所朕以
景已之地去宮遙遠每月所居因時享祭常備文物動有
煩勞在於朕懷殊非所謂今故裁基紫掖闔宇彤闈經
始肇興成之匪日但敬事天地神明之德乃彰尊祀祖
宗嚴恭之志方展若使惟云布政負宸臨人則茅宇土

階取適而已豈必勞百姓之力制九筵而御哉誠以獲
執蘋蘩虔奉宗廟故也時既沿革莫或相遵自我作古
用適於事今以上堂為嚴配之所下室為布政之居光
敷禮訓式展誠敬來年正月一日可於明堂宗祀三聖
以配上帝宜令禮官博士內外明禮者詳定儀注務從
典要速以奏聞者

垂拱四年
十二月

明堂災告廟制

朕君臨紫極撫育蒼生普該有識之流為啟無疆之福

神宮之後式建尊容頃緣內作工徒宿火誤燒麻主遂涉明堂然朕昧旦憂勤不遑寢食慮虧至道未副天心內省厥躬伏增寅畏槐棘署衆僚庶尹宜竭迺誠各揚其職內作工匠可即放還刺史縣令風化之首宜矜恤鰥寡敦勸農桑均平賦役省察姦盜里閭妖訛尤嚴禁遠近冤訟令早決斷見禁囚徒速為處分老病之色征鎮之家亦令州縣加意撫存諸作非要切者量事宜停所司供進之物並宜節減其長才廣度沉跡下僚據德依仁韜

聲幽閑懷玉佐之器乏知己之容宜令京官職事五品以下及刺史上佐縣縣令等各准狀薦舉仍遣内外文武百官九品以上各上封事極言正議無有所隱

親祀明堂赦

朕聞惟天為大所以上序三宗惟帝為尊於是宏開七廟故知肇興衢室爰申宗祀之規乃建明堂式廣嚴禋之禮莫不八窗四闥分景氣於炎涼複廟重簷定尊卑於昭穆實為國之洪訓乃經邦之茂典我國家聖祖神宗

重光累業道軼羲農之上功侔造化之初冠今昔而居
尊掩寰區而作大朕承天撫運纘聖開元披鳳曆而乘
時握龍圖而建極春秋變易每增霜露之心日月推移
倍切蒸嘗之思然而城臨丹鳳清廟久安水控玄龜神
基未立金輿往幸空展望於遙祠玉輦來巡實幸親於
碣石三川帝里八水皇州豈皇邑之相誇乃都畿而有
謝所以交風興壤還開候歷之庭揆日名區更置馴龍
之室龜紫座無虧薦鮪之途奕奕丹宮遂得獻羔之

所加以總章霧闢重屋煙披懸曉日於海梁挂晴虹於
柱棟是以用斯圭璧奠彼牲牢鳴孤竹之簫管奏空桑
之琴瑟爰於附享之日乃至禋宗之晨景色殊長煙雲
冠古或凱風南至扇喜氣而分輝或驟雨東來引祥雲而合
嚮固可以作樂崇德殷荐上帝而碧海遙澄覺三邊之
霧卷丹青上廊看九野之塵清祖宗之靈貺昭然宇宙
之神心可見虔奉既展盛禮斯弘量作解之恩以廣奉
先之德但赦者小利而大害始泰而終否著小人之幸

非君子之幸今歲以來頻敷渥命徒長僥倖逾犯憲章
非所以弘獎風猷發揮名教深慮無知者因茲獲罪有
識者緣此致譏遐思管仲之編緹想吳漢之說恐負不
構慨然長想昔孔明相蜀王猛佐秦咸以數赦為言俱
稱肆眚非便朕惟新開政方事澄源期望古而裁規且
修今而布澤伏以禮申崇祔情展恭禋式流曠蕩之恩
兼明懲勸之道可大赦洛州境內天下諸州見禁囚徒
應至死者特宜免死配流者入徒餘並原宥在京文武

三品以上賜爵一級四品以上各加一階内外文武九品以上賜勲一轉皇親嗣王郡王仍特許佩金魚袋内外職事官三品以上及四品清官并中書門下五品父已亡者並量加追贈如聞天下諸觀皆畫化人之變諸寺亦畫老君之形一種尊容兩俱不可限制到後十日並除却有故留者即科違勅罪其化胡經先有明勅禁斷如聞在外仍頗流行自今諸部化胡經事及諸凡說化胡事處並宜除削在外百姓之家百兩未行親俄殞

歿停哀之際便即成婚遂輟首經之容敢申花綵之禮
寧戚之容安寄罔極之志缺如敗俗傷風莫過於此自
今後宜令懲革自弘道以前繼任相三年已上及秦
府晉府僚佐四品以上并食實封功臣雖經罪責不
致破家子孫無任京官者宜優與一官英府周府舊僚
五品以上官子孫亦宜准此天下百姓為父後者各賜
古爵一級大酺三日又制内外文武四品以上官并縣
令京司清官九品以上各舉孝弟廉讓一人

神龍元年九月

社稷

親祀太社詔

厚地載物社主其祭嘉穀養民稷惟元祀列聖垂範昔
王通規建邦正位莫此為先爰暨都邑建於州里率
土之濱咸極莊敬所以勸農務本修始報功敦叙教義
整齊風俗末代澆浮祀典虧替時逢喪亂仁惠施薄壇
壝缺昭備之禮鄉里無紀合之訓朕握圖受歷菲食卑
宮奉圭璧於尊嚴潔粢盛而裡燎尚想躬稼勵精治本

永言復禮深存往紀是以吉日惟戌親祀太社率從百
寮以禮九穀今既南畝俶載東作方興州縣置禮宜盡
祇肅四方之民咸勤植藝隨其生類命為宗社京邑庶
士臺邑羣臣里閭相從共遵社法以時供祀各申祈報
兼存宴醕之義用洽鄉黨之歡具立節文明為典制進
退俯仰登降折旋明加誨勵遞相勸獎齊之以禮有耻
且格布告天下即宜遵用

武德九年正月

昇社稷及日月五星為大祀勅

孫逖

勅祭之為典以陳至敬名或不正是相奪倫況社稷享
佑百代蒙其福日月臨照五星叶其紀兆人允殖下土
式瞻既超言象之外須極尊嚴之禮列為中祀頗紊大
猷永言允當必在刊革自今以後社稷日月五星並昇
為大祀仍以四時致祭諸畀為中祀庶昭報之誠格於上下
欽崇之稱合於典則

唐大詔令集卷七十三

欽定四庫全書

唐大詔令集卷七十四

宋 宋敏求 編

典禮

藉田

貞觀三年藉田詔

藉田制

停藉田雕飾農器詔

元和五年罷藉田勅

開元二十三年藉田赦書

九宮貴神

親祭九宮壇勅

親祭九宮壇大赦天下勅

嶽瀆山川

封華嶽神為金天王制

冊東海神為廣德王文

令盧從愿等祭獄瀆勅

令嗣鄭王希言分祭五嶽勅

令嗣許王瓘祭東嶽勅

禁驪山樵採勅

雨澤頓降昭報山川勅

令關內諸州長官祭名山大川勅

遣官祭霍山勅

蕭昕等分祭名山大川勅

立終南山祠勅

雜祀

天地宗廟外祭用少牢詔

置壽星壇勅

昇風伯雨師為中祀勅

五人帝祝文勿稱朕詔

親拜風伯雨師祝板詔

條貫祀事勅

籍田

貞觀三年籍田詔

周宣在位已墜茲禮近代以來彌多所缺朕祇承大寶
憲章典故今將履千畝於近郊復三推於舊制宜令有

司式遵典禮

貞觀三年正月十八日

籍田制

張九齡

門下萊盛所以奉神祇耕籍所以助人力既義率乎下
而敬在其中是為先農存乎大典故周宣不復於古而

欽定四庫全書

唐大詔令集
卷七十四

三

號公致諫漢文能修其制而班史稱美朕自御極以來
動咨故實惟是千畝未展三推墮神困人降災移歲靡
不在此良以憮然今星紀既周土膏將動去農祥而卜
日考帝籍之以時朕其親耕以實御廩宜令禮官博士
詳擇典故有司速即施行

停藉田雕飾農器詔

古之聖王臨御天下莫不務敦本實儉為先蓋用勤身
率下也屬東耕啟候爰事藉田將欲勸彼蒸人所以執

茲耒耜如聞有司所造農器妄加雕飾殊匪典常紺轅
縹軌固前王之有制務奢尚靡諒偽教之所託靜言思
之良用歎息豈朕法堯舜重茅茨之意耶其所造雕飾
者宜停仍令有司依農用常式即別改造庶萬方黎獻知

朕意焉

乾元二年正月

罷藉田勅

勅朕以東郊藉田禮之重者爰擇吉亥用祀先嗇上以
供粢盛下以勸稼穡式展三推之義敢辭四體之勤亦

既草儀方將肅事再思理本旁采衆詞以江淮水旱之
餘河朔師旅之後宜寬物力以濟蒸元況當三農休息
之時有百司供具之費道途灑掃暴露勤勞惕然在懷
是用中止雖前有成命皆已施行而重煩吾民則無固
必其來年正月十八日籍田禮宜暫停於戲夫聖人無
心以徇百姓朕亦虛已用圖大中苟事未宜則改而求
當凡百卿士期悉予懷

元和五年十
一月十九日

籍田赦書

門下昔者受命為君體元立極未有不謹於禮而能見教
於人朕其庶乎有慙作者方冊存而可舉舊章絕而復尋
自古所行無一而廢將以上乞靈於社稷下蒙福於黎元
朕茲精誠天實降鑒令嗣歲初吉農事將起禮有先於耕
藉義緣奉於粢盛是所嚴共敢不敬事故躬載耒耜親率
公卿以先百姓遂終千畝謂敦本之為爾可布澤之更深
宜有順於發生俾無偏於行惠可大赦天下自開元二十
三年正月十八日昧爽以前大辟罪以下罪無輕重已發

覺未發覺已結正未結正囚繫見徒咸赦除之其犯十惡
死罪不在赦限其餘死罪特宜配流嶺南遠惡處官典犯
贓本犯至死貶與嶺南遠惡左降官至流者亦量貶與遠
官典配諸軍効力計贓至徒仍不得重令却上天下諸州
損免處稅地先矜放其非損免處有貧乏未納者並一切
放免代糧種子開元二十一年以前並宜放免京兆河南府
秦州百姓有諸色勾徵及通懸欠負亦宜放免其在官典
及倉督等腹內者不在免限天下色役爰及支用務令

節減並諸色貢賦先令中書門下均融減省宜准前勅
速即條奏捐免州稅戶錢米納并七等以上戶租先未
處分五色資錢課未納灼然不辨者並放至蠶麥秋收
以來贖納捐免州逃兵健兒承前訪捉不獲合取藉人
充替自資裝送軍程期逼迫頗亦辛苦並蠶麥以後發
遣仍令所司預與軍州計會諸州征行人並令州縣存
恤其征行人有父母年七十以上者委本道採訪使檢
責取實牒報本軍即放還本貫軍司據闕募取健兒充

替行人及防丁有身亡者為造棺襯遞還本鄉諸州應
發防丁去本貫一千里以上比來除正課之外給一丁
充資多不濟辦宜更量與資助兩京城內今年所有諸
雜夫役並宜放免應須使役以諸錢和雇取充農桑是
時不得妨奪州縣官長倍加勸課孝子順孫義夫節婦
旌表門閭鰥寡惇獨不能自存量加優恤天下侍老百
歲以上版授上州刺史九十以上中州刺史八十以上
上州司馬其七十以上所由仍量給酒肉各令存問亞

獻皇太子鴻賜物二千疋終獻慶王潭賜物一千疋邠王守禮等各賜物一千疋忠王浚以下各賜物三百疋夾侍正衣進珪汝陽郡王淳等各賜物二百疋皇太子夾侍正衣等各賜一百疋裴耀卿等自其翊贊誠有忠益頒賞以序等數須優宜各與一子官仍各賜物三百疋二王後各賜物一百疋長公主各與一子官仍各賜二百疋嗣王郡主縣主各賜物一百五十疋在寮文武官見任及致仕并諸色陪位官一品賜物八十疋二品七

十疋三品六十疋四品五十疋五品四十疋六品三十疋八品九品二十段節度副大使三都留守京兆尹各一百疋四大都督府長史諸道採訪使各八十疋諸賜物應兩給者從一處給其耕官及侍耕官各賜勲兩轉丞相蕭嵩與一子官仍賜物二百疋攝九卿諸侯等各與一子出身仍賜物一百五十疋侍耕執牛官各賜物一百二十疋昇壇行事官修禮儀官及判官等更賜一階應入三品五品官階相當減四考聽入攝司徒信安

郡王禕禮儀寧緇既不叙階禕與一子官賜物二百疋
緇與一子出身賜物一百五十疋其昇壇及兼禮儀兩
兼從一加階應與一子官及出身者若無子聽迴與周
親供奉及押階不昇壇并壇下及助耕執牛官別勅差
中書門下差定人數等泛階合入三品五品階至考未
足者待考足日聽龔待考者賜勲兩轉未承別賜者各
賜一等知頻使賜物一百疋修壇場長官屯官撰玉冊
齎各賜物八十疋書玉冊官賜物五十疋管籍田縣令

賜物六十疋。臺文武官朝集使官充十道採訪使并判官諸道節度使及諸道通表使判官新除五品以上官未赴任都城畿縣令見在陪位者三品以上轉爵一級四品以下加一階。皇親諸親及九廟子孫不入等陪位者並外文武官九品以上各賜勳。轉諸蕃入廟及賀正蕃客應陪位者共賜物五十疋。節級分付南北衙門行從宿衛齋宮及武官押當有職掌并諸色雜職掌并應耕公卿從官等各賜勳一轉。萬騎及飛騎見當上者各賜勳一轉。

其宿衛齋宮者加賜物三段伏內防侍諸色從人各賜物三段曠騎番兵角弓手弩手官馬主見當番及留帖人掌開幕士駕士供膳習馭工人樂人見當有上職掌并庶人應耕者各賜物三段齋卽禮生贊者行事者並減兩年勞無勞可減者齋卽放出身禮生贊者選日稍優與分三衛七色見當番并流外行署及蕃官見上有職掌者各賜熟一轉河南洛陽縣陪位父老各賜物五段近壇百姓各免今年雜差科宗廟致享務存豐潔禮經沿

革必本人情遵豆之薦或未能備物服制之紀或有未
通宜令禮官學士詳議具奏朕自臨天下二紀於茲不
敢荒寧日加兢業而災眚未弭黎人未康若有由而然
則在予之責有能直言極諫者具以狀聞每渴賢良無
忘鑒昧頃雖虛佇未副旁求其才有王霸之畧學究天
人之際知勇堪將帥之選政能當牧宰之舉者五品以
上清官及將軍都督刺史各舉孝悌力田鄉閭推挹者
本州長官勘責有才堪應務者各以名奏致倭久歷清

資終始著稱年漸衰邁情有可矜量與改職依前致仕
宗子中有才行著聞此尚沉屈者委宗正勘責奏聞唐
元兩營立功官任折衝並改與郎將郎將改與中郎其
亡官失爵量加收叙五岳四瀆名山大川及自古聖帝
明王忠臣良相並宜所在長官以禮致祭赦書有所未
該者所司比類聞奏亡命山澤挾藏軍器百日不首復
罪如初敢以赦前事相告言者以其罪罪之都城內賜
酺三日赦書日行五百里布告遐邇咸使聞知

九宮貴神

親祭九宮壇勅

勅惟神之主必恭禋祀率先之訓義在躬親朕欽若昊
穹子育黎庶思通明靈之德以洽和平之理是修缺典咸
秩無文如在之誠久陳於郊廟懷柔之至亦偏於山川
況九宮所主百神之貴上分天極下統坤維陰陽生靈功
深亭育故式昭新典肇建明禋將以為人載祈乎祐宜叶
元吉之辰用申大祭之禮可以立春日朕親祭九宮壇

仍令中書門下與禮官等即詳定儀注奏聞

天寶三年十二月

親祭九宮壇大赦天下制

孫逖

門下九宮之祀百代莫修豈日給之不暇將靈享之有待朕當宸君臨握圖纘業每聽政中昃疇咨讜言觀書考禮以采故實勵精為理三紀於茲上荷宗廟延祥克開厥後下賴股肱叶德以致雍熙而麟鳳龜龍近遊郊藪蠻夷戎狄遠輸賁賁乘時來之休運恢皇建之遠圖是以圓丘方澤之儀昇中告類之禮無典不舉靡神不

懷恭惟九宮明祀尚缺載深兢惕用建靈壇爰以元辰
親執奠獻叶青春發生之慶祈黔黎啟祐之福今至誠
式展大禮云備瑞景和風神心如荅無疆之福豈獨在
予非常之澤宜覃率土可大赦天下自天寶三年十二
月二十五日昧爽以前大辟罪已下罪無輕重咸赦除
之其十惡死罪造偽頭首謀殺攻劫及官典犯賊不在
免限朕惟善政實在養人作法務從於寬簡任事必量
於齒力比者成童之歲即掛輕徭既冠之年便當正役

憫其勞苦用軫於懷自今以後天下百姓宜以十八以上為中男二十三以上成丁又任土作貢先標程式或非所有不免貿遷事既非宜理難經久并應徵課稅及支遣諸色物或期程之間遲違非便並委所司與朝集使商議取穩便處置奏聞

實錄載敕文云每歲傭調八月徵收農功未畢恐難濟辦自

今以後延至九月三十日為限而却無任土而下至此

諸軍行人遠為邊扞修短

之分雖有定期從役而終良深軫念其有臨陣亡歿骸骨未還本貫令節度使給棺櫬遮歸又防邊禦寇實謂

難勞貧戶單丁固茲存養便令差遣去住難堪自今以後應差行人家無兼丁不在取限自古聖人皆以孝理五帝之本百行莫先移於國而為忠事於長而為順永言要道實在人弘自今以後令天下家藏孝經一本精勤誦習鄉學之中倍增教授郡縣官吏申明勸課百姓間有孝行過人鄉閭欽伏者所由長官具見以名薦其有父母見在別籍異居虧敗名教莫斯為甚特宜禁絕勿使更然并親歿之後亦不得令有分析郡縣切勒令

在惟行自今以後如有不友不恭傷財破產者宜配磧
西用清風教朕惟熙庶績博訪逸人豈惟振拔滯淹以
期於大用亦欲褒崇高上將敦於薄俗虛佇之懷兼在
於此其有高蹈不仕遁跡丘園遠近知聞未經薦舉者
委所在長官以禮徵送又崇德追遠式閭封墓用旌前
烈以叶大猷自古聖帝明王名臣烈士陵墓有頽毀者
宜令所管量事修葺仍明立標記禁止樵採天下侍老
百歲以上賜帛五段粟三石八十以上帛三段粟二石

仍令郡縣長官存問給付亞獻太子諱賜物二千疋終
獻慶王棕一千疋正衣夾侍各五百疋親王各三百疋
新封建郡王及國公各一百疋賢妃三百疋長公主各
三百疋公主各二百疋嗣郡王各一百疋中書門下三
品竭心翊戴弘益實多各與一子官如已授官量與一
轉内外文武官三品以上賜爵一級四品以下各加一
階一品賜物七十疋三品以下六十疋五品以下賜物
四十疋六品以下二十段諸節度使各賜物一百疋三

京留守及二王後各八十疋採訪使各六十疋諸蕃客
共賜二千疋其唐元功臣締構之初竭其忠款錄功念
舊情所不忘普恩之外更加一階其身歿者各賜一子
官皇親五等以上及九廟子孫諸親三等以上未有出
身者並放出身其前資者選日稍優與處分見任者更
賜勲兩轉應天下賜酺三日赦書有所未該者所司類
例聞奏宣布中外咸使聞知主者施行

嶽瀆山川

封華嶽神為金天王制

蘇頌

門下惟嶽有五太華其一表峻皇居合靈興運朕恭膺
大寶肇業神京至誠所祈神契潛感頃者亂常悖道有
甲兵而竊發仗順誅逆猶風雨之從助永言幽讚寧忘
仰止厥功茂矣報德斯存宜封華嶽神為金天王仍令
龍景觀道士鴻臚卿員外置越國公葉法善備禮告祭

主者施行

先天二年
八月二日

冊東海神為廣德王文

維天寶十載歲次辛卯三月甲申朔十七日庚子皇帝
若曰於戲四瀛宅日百谷稱王望祀之禮雖申崇名之
典猶缺惟東海浴日浮天納來弘往善利萬物以宗以
都朕嗣守皇圖式存精享神心允穆每叶休徵今五運
惟新百靈咸秩思崇封建以展虔誠是用封神為廣德
王其光膺典冊保乂寰宇永清坤載敷佑邦家可不美
歟惟南海蕩滌炎州包括溟漲涵育庶類以成厥德惟
西海汜濫䟽名清晏表德成茲潤澤奠彼金方惟北海

限蠻阻夷實資坎德含竒蘊粹實曰天池其禮如東海
命盧從愿等祭岳瀆勅

勅五嶽視三公之位四瀆當諸侯之秩載於祀典抑為
國章方屬農功頗增旱暵虔誠徒積神道未孚用申靡
愛之勤冀通能潤之感宜令工部尚書盧從愿祭東嶽
河南尹張敬忠祭中嶽御史中丞兼戶部侍郎宇文融
祭西嶽及西海河瀆太常少卿張九齡祭南嶽及南海
黃門侍郎李嵩祭北嶽右庶子何鸞祭東海宗正卿鄭

絳祭淮瀆少詹事張晤祭江瀆河南少尹李暈祭北海
及濟瀆且潤萬物者莫先乎雨動萬物者莫疾乎風暵
彼靈神爰稱師伯雖有常祀今更陳祈宜令光祿卿孟
溫祭風伯右庶子吳兢祭雨師各就壇場務加誠敬但
羞蘋藻不假牲牢應緣奠祭尤宜精潔

開元十四
年正月

令嗣鄭王希言分祭五嶽勅

孫逖

勅歲之豐儉固係於常數天之感應實在於精誠頃者
按以陰陽求之推步至於今歲不合有年朕乃齋心妙

聞懇祈玄德靈徵不遠丕應用彰果獲西成頗為豐熟
蓋至道儲祉惠於蒸人亦羣臣叶贊錫以昭假宜令光
祿卿嗣鄭王希言祭東嶽太子詹事嗣許王瓘祭北嶽
太常卿韋縉祭西嶽衛尉卿嗣吳王祗祭南嶽宗正卿
濮陽郡王徹祭北嶽所司即擇日錄奏其四瀆及名山
大川或遠近不同各委所由郡長官便擇吉日致祭務
崇嚴潔以稱朕懷

令嗣許王瓘祭東嶽勅

勅務農勸穡維用於天道人和歲稔實賴於神休頃者
春夏之交稍愆時雨收穫之際復屬秋霖慮害農功每
祈孚祐遂得百神降德庶徵不易先朝禮神以明德恭
事以嚴裡進其位號崇其典策用三代之樂金石必備
盡九州之味籩豆有加俾國之大臣每歲頒祀則執事
而有恪亦莫不寧也朕纂戎八載外寇未平多廢舊章
尚勞戎備巡狩之事有曠於虞書封禪之儀尚慙於漢
史雖命方征収以時致祭而事之不親誠有不達所以

分遣八使禱於羣望各供於事以服官常宜令其官等
分祭名山大川仍勅有司備具禮物敬陳明薦無失正
辭羣望效靈既不為災仍多豐熟幽贊之道普洽於
生人昭報之儀式遵於典禮宜令太子詹事嗣許王
瓘祭東嶽所司郡長官備禮致祭務陳黼潔以達精
誠

禁驪山樵採詔

勅驪山特秀峯巒俯臨郊甸上分艮位每洩雲而作雨

下出蒙泉亦蕩邪而蠲瘵乃靈仙之攸宅惟邦國之所
瞻可以列於羣望紀在咸秩自今以後宜禁樵採量為

封域稱朕意焉

開元四年正月十九日

雨澤頻降昭報山川勅

爰自首春有愆時雨朕憂勤祀獻精禱靈祇遂蒙九玄
垂福百神効祉膏澤頻降嘉生繁育睠彼山川能興雲
雨報功享德祀典存焉諸州府所管名山大川宜令當
處長官設祭務盡誠敬以昭典禮

開元十四年六月

令關內諸州長官祭名山大川勅 孫逖

勅朕為人上未嘗自逸每勤於政思致豐年而去冬以來雨雪微少竊恐春事有害農功是用齋心躬自申禱神歆允答甘澤遂流豈朕之微誠敢當丕應蓋天之鑒佑惠及生人詩不云乎無德不報昭賽之義豈可闕如其關內名山大川及有靈祠宜令所由長官擇日致賽務令豐厚各盡誠潔以副朕懷

遣官祭霍山勅

三代之初皆有神降鑒其德也天實啟之恭惟王業之
初師及霍邑堅城未下大將阻兵連雨經旬糧儲不給
白衣父老忽詣軍門稱霍山之神謁大唐皇帝云東南
取路八日雨止助帝破敵盡如其言巖巖霍山九州之
鎮興雲致雨功已洽於生人親道輔德力更宣於王室
朕纘承大寶膺受洪休肸蠁之間誠明可接永言幽贊
茲謂有孚惟天命神據我斯意爰宜令禮儀使判官司
封員外郎薛頴即往霍山致祭正辭以薦稱朕意焉

蕭昕等分祭名山大川制

常袞

勅有天下者祭百神蓋存乎統法也山川出雲而致風
雨列在明祀其來久矣春秋傳曰水旱癘疫之不時於
是乎崇之致其誠信與其忠敬精意以享可通神明保
佑命之不疾而速古之岳瀆秩視公侯以其所生者繁
所濟也廣鎮厚地而不動朝滄海而不洩如是正直長
發其祥百王相承五

闕

立終南山祠勅

每聞京師舊說以為終南山興雲即必有雨若常晴霽
雖蠶他至竟不沾濡况茲山北面闕庭日當恩顧修其
望祀寵數宜及今聞都無祠宇炭谷湫韜命祀終南山
未備禮秩湫為山屬捨大崇細深所謂闕於興雲致雨
之祀宜令中書門下且差官設奠宣告恩禮便令擇立
廟所迴日以聞仍命有司即時建立

開成二年

雜祀

天地宗廟外祭用少牢詔

國家草創日不暇給凡厥禮儀鮮能盡備且生人未久凋弊實多至於畜產思致蕃息祭祀之本皆以為身窮民事神有乖正直殺牛不如禴祭明德即是馨香望古推今祭神一揆其祭圓丘方澤宗廟以外並可止用少牢舊用者甯特牲時和年豐然後克循常禮

武德元年十月

置壽星壇勅

德莫大於生成福莫先於壽考苟有所主得無祝之今

有上封者言仲秋日月會於壽星以為朕生於是月欲以配社而祭於義不倫且壽星角亢也既為列宿之長復有福壽之名豈惟朕躬獨享其應其天下萬姓寧不是懷蓋秦時已有壽星祠亦云舊矣宜令所司特置壽星壇即以千秋節日修其祀典

開元二十四年十月

昇風伯雨師為中祀勅

孫逖

勅六氣不僊所以成歲百神咸秩必也正名况風伯雨師濟時育物蕃茲動植溥暢生靈厥有茂功當崇於昭

報謂之小祀頗紊於彝倫去載諸星以為中祀永言比義固合同昇自今以後其風伯雨師並宜昇入中祀仍令諸郡各置一壇因春秋祭祀之時同申享祀用刊前典之謬以致蒼生之福

五人帝祝文勿稱臣詔

郊祀之義本於至誠制禮定名宜從事實五方配帝上古哲王道濟蒸人禮著明祀論善計功則朕德不類統天御極則朕位攸同而祝文稱臣以祭既無益誠敬有

黷等威此豈朕裡祀聰明昭格上下之意前京兆府司
錄事叅軍高佩上疏其理精詳朕重變舊儀訪於卿士
申明大義是用釋然宜從改正以敦至禮自今以後五
方配帝祝文勿稱臣餘禮如舊

親拜風伯雨師祝版勅

風伯雨師等升為中祀有列祖成命況在風雨實切蒼生
今雖無文朕當屈已再拜以申子育萬姓之意

條貫祀事詔

王者受天地之明命繼祖宗之鴻業所以祇服大事致誠嚴禋盡其孝敬之心崇其郊祀之禮必在匪懈不忒棗盛豐潔古今丕訓無易於此朕嗣位十載恭臨萬邦務三時以厚生睦九族以修教每勵薄德汙茲小康中宵內懼愧不克稱實天地之睠祐宗社之威靈思欲罄其精誠奉以昭報豈聿懷之敢望實如在而齊心如聞近歲有司因循將事不恪牲牷徒具滌濯無聞鼎俎雖陳禋薦多缺祠官或怠於齋肅胥吏有至於喧呶戲

禮瀆神莫斯為甚永言重事用惻深衷起今以後太廟
郊社齋即先事前一日委監察御史仔細點檢如有替
代非正身者當時禁身推問聞奏當重科懲既責躬親
須議優獎其齋即委中書門下商量與減選應緣祠祭
官下至齋即及樂人吏等致齋日有博奕飲酒喧呼爭
競者委御史臺糾察聞奏其牲牢准禮循行之際合視
肥瘠之宜近日相承臨時取辦既乖誠敬頗失舊章委
太僕寺准禮令處分如無本色牛羊速具聞奏至於酒

醴醢醢簋簋膳羞各委本司准禮令切加提舉凡有廟
壩所宜肅敬縱云隙地豈廢修崇如有耕墾藝植者亦
仰御史臺糾察聞奏攝祭公卿雖約官品將朕誠敬必
在得人委尚書省差定之時稍加慎選其祭器禮物中
如有欠缺及濫惡須填補改張者委太常宗正光祿太
僕寺少府監諸司速具條疏聞奏仍委中書門下即與
疏理處分於戲禮崇明祀神享至誠上下苟無其心所
為必乖於典由是怵惕用致齋莊咨爾庶工各揚厥職式

遵禮典稱朕意焉

寶曆九年二月

唐大詔令集卷七十四

欽定四庫全書

唐大詔令集卷七十五

宋 宋敏求 編

典禮

太清宮

太清宮行禮官改用朝服并停祝版勅

太清宮改為朝獻薦獻制

廟制

令所司與禮官議宗廟制

令公卿議太原建寢廟詔

增置太廟九室詔

常薦

宗廟薦享別奠樽爵詔

太廟五享令宗子攝事詔

令兩京各日享廟詔

享太廟料外別置牙盤食詔

禘祫不廢常享詔

祫遷

遷獻懿二祖詔

親享

令皇帝親謁太廟誥

明皇即位謁太廟赦

親謁太廟錫賜宗支庶官制

親享九廟制

太清宮

太清宮行禮改用朝服并停祝版勅

勅尊祖奉先必在於崇敬辨儀正禮所貴於緣情伏以大聖玄元皇帝御氣昇天長生久視體重玄而不測與元化而無窮真容屢見寶符仍集恭惟玄祐實表常存比者太清宮行事官皆具冕服爰及奏樂未易舊名并告獻之時仍陳筭祝既非事生之禮皆是降神之儀但真俗殊倫幽明異數理有非便亦在從宜自今以後每

於太清等宮行禮官宜改用朝服兼停祝版其告獻辨
及所奏樂章朕當別自修撰仍令所司具儀注聞奏

太清宮改為朝獻薦獻制

春秋致享用存昭敬祝史陳信必在正辭苟名謂之或
乖於上下而非便經稱崇事易載顯若所以展祗肅明
等威朕欽崇道本嗣守丕業每懷如在之誠敢忘奉先
之旨禮或未達情實匪寧承前有事宗廟皆稱告享茲
乃臨下之辭頗虧尊上之義靜言斯稱殊為未允自今

以後每親告獻太清宮太微宮改為朝獻有司行事為薦獻親告享宗廟為朝享有司行事為薦享親巡陵為朝拜有司行事為陵拜應緣諸事告宗廟者改為奏其郊天后土及祝云敢昭告者並為敢昭薦於戲式崇轉禮庶表因心宣示中外令知朕意

天寶九年十一月

宗廟

廟制

令所司與禮官議宗廟制

朕以不造執殲在疚日月如流皇靈浸遠霜露所感觸
目殞絕宗廟之制有國大典皇運之始且事因循今山
陵有日遷祔非遠宜允舊章永世作則可令所司與禮

官等詳議奏聞

貞觀九年九月

令公卿議太原建寢廟詔

昔周監二代崇文武之典禮漢紹三王尊高光之功烈
斯固有國之彝訓不刊之令範高祖太武皇帝聰明神
武獻聖徇齊應天順民撥亂反正德侔造化道濟區夏

靖率土之沸騰拯黔首之塗炭一戎大定四海宅心制
治定之禮作功成之樂天地交泰品物咸亨聲教遐播
休徵雜沓蠻夷戎狄之長輻輳藁街麟鳳龜龍之祥光
映圖史然猶日慎一日推而弗居邁遂古之鴻名踰前
王之至治朕以寡昧丕承景業緬惟永往攀慕終天思
弘尊親之道庶展罔極之志切惟太原之地肇基王迹
事均豐沛義等宛譙理宜別建寢廟以彰聖德詳觀漢
典抑有成規但先皇遺旨務在儉約虔奉訓誡無忘啓

處宜令禮官與公卿等詳議以聞

貞觀九年十二月

增置太廟九室詔

朕聞王者乘時以設教因事以制禮沿革以從宜為本
取舍以適會為先損益之道有殊質文之用甚異且夫至
德之謂孝所以通於神明大事之謂祀所以虔於宗廟
國家握紀命歷重光累盛四方由其繼明七代可以觀
德朕嗣守丕業祇奉睿圖聿懷昭事罔不卹祀嘗覽古
典爰詢廟制遠則殷周事異近則漢晉道殊雖禮文之

不一固敬嚴之無二朕以為立愛自親始教人睦立敬
自長始教人順是知政以道存禮從時變將因宜以創
制豈沿古而限今況恩以降殺而踈廟以遷毀而廢雖
式瞻古訓禮則不違而永言孝思情所未足享嘗則止
豈愛崇而禮備有禱而祭非德盛而流永其祧室寔為
正室將使親而不盡遠而不祧廟以貌在宗由尊立俾
四時式薦不間於毀主百代靡遷匪惟於始廟所謂變
以合禮動而得中嚴裡之典克崇肅雍之美茲在又凡

弟繼及古有明文今中宗神主猶居別處詳求故實當
寧不安移就正廟用彰大典仍創置九室宜令所司擇

日啟告移造

開元十
年六月

常薦

宗廟薦享別奠樽爵詔

朕以寡德嗣守宗祧雖明發載懷肅恭禋祀踐霜露而
興感奉洗腆以增哀每惟宗廟至敬虔誠裸享而二尊一
奠情有未安思革舊章用崇嚴配管子曰禮者因人之情

緣理而為之節也故三王五帝禮制不同損益隨時期
於通變況罔極之思既展於茲辰終身之慕情深於是
日豈可以因循禮經乖違誠敬自今以後宗廟享爵及
簋簠登鉶各宜別奠其餘列饌並依常典

乾封元年六月

太廟五享令宗子攝事詔

宗廟致敬必先於如在神人所依無取於非類深惟至
理用切因心具應緣太廟五享於宗子及嗣王中揀擇
有德望者令攝三公行事異姓官吏不須令攝

開元二十七年

二月

令兩京各日享廟詔

朕肅承宗祀不敢怠遑誠有未安夙夜祇惕頃四時有事太廟兩京同日告享雖虔卜吉辰但遵上日而義深如在祀或有乖自今以後宜各別擇吉日告享

天寶三年四月

享太廟料外置牙盤食詔

勅祭神如在傳諸古訓以多為貴著自禮經腍膾之儀蓋昔賢之尚質甘旨之義亦孝子之盡誠既切因心方

資變禮其自今以後享太廟宜料外每室加常式一牙

盤仍令所司務盡豐潔

天寶五年四月十六日

禘祫不廢常享詔

禘祫之禮以存序位質文之變蓋取隨時國家系本仙
宗業承聖祚重熙累盛既錫無疆之休合享登神思弘
不易之典自今以後每神並於太清宮聖祖前設位序
正上以明陟降之禮欽若玄宮下以盡虔恭之誠無違
正道比來每緣禘祫時享則停事雖適於從宜而禮或

虧於必備以後每緣禘祫其常享無廢又奉先追遠
禮惟昭德崇福展敬義在因心自今以後獻祖宣皇帝
宣莊皇后懿祖光皇帝光懿皇后忌日宜令京城寺觀一
日設齋太祖景皇帝景烈皇后代祖元皇帝元貞皇后
忌日京城三日行道

祧遷

遷獻懿二祖詔

國之大事式在於明禋王者孝享莫重於殷祭所以尊

祖而正昭穆也朕承列聖之休德荷上天之眷命虔奉牲
帛二十有五年永惟宗廟之位禘嘗之序夙夜祇慄不
敢自專是用延訪公卿稽叅典禮博考羣議至於再三
敬以令辰奉遷獻祖皇帝神主懿祖皇帝神主祔於德
明興聖皇帝廟太祖景皇帝正東向之位宜令所司備
禮務極嚴重祇肅祀典載深感惕咨爾中外宜悉朕懷

貞元十
九年

親享

令皇帝謁太廟誥

誥昔重華嗣德格於文祖高密陟后至於神宗蓋所以
敬履端之元中孝享之道皇帝初嗣大寶允膺休命歡
洽人靈慶溢宗社宜躬祗祀典用展肅雍可以今月四
日謁享太廟所司准此

先天元年十月

明皇即位謁太廟赦

門下繼明嗣德王者所以承天尊祖奉先聖人所以崇
孝故上日之禮著乎重華月朔之祠襲乎受命猗歟作

頌發流瘡哲之祥清廟昇歌思表配天之業歷選前載
可得而言我國家首出開元繼文膺統七代觀德至道
洽於生人三后在天世裕光於後嗣太上皇帝道超繫
表功軼帝先名言不測於乾行仁智不知於日用累讓
神器非以黃屋為尊俯膺太室蓋以蒼生屈志黎人於
變淳化期登載懷脫屣疇咨菲薄竭讓德之至天睠弗
回陳拜首之誠沖襟逾邈遂以寡昧祇踐宸居循顧紹
庭載深寅畏爰撰初吉躬展肅雍虔肆獻之儀申大號

之典神保之享斯洽介福之道攸宜億兆同歡人祇同
慶恭承聖訓申茲沛澤可大赦天下

親謁太廟錫賜宗支庶官制

朕聞理莫大於孝所以通神明事莫大於祀所以謁宗
廟顧此薄德獲承丕緒恭虔夙夜弗敢遑寧去歲爰命
有司增營太室尋以匠者功就饗禮斯舉雖是效是則率
由舊章而不躬不親曷盡誠敬粵自河洛旋於京師聿
修齋祭致用蠲潔屬羣方駿奔庶位咸旅裸奠式受感

懷載殷聖靈在天若享精意伊爾王公卿士下逮黎蒸
道存念茲惠乃錫類七廟元皇帝以上三祖枝孫恐有
失官序者宜各與五品京官皇祖妣諸家有子孫今在
選序者量加甄錄擇內外官三品以上有廟者各賜絹
三十疋以修祭服俎豆緣謁廟亞獻郊王守禮終獻宋
王憲各賜三百疋夾侍岐王範薛王業各賜絹二百五
十疋自餘行禮及供奉三品以上賜一百六十疋四品
一百四十疋五品一百二十疋六品一百疋七品八十

正八品六十疋九品四十疋鹵簿六引官各減一等押
仗官又減一等攝官依本官給有兼充諸使者加一等
兩京文武官并朝集使諸方道表一品七十疋三品六
十疋四品五十疋六品四十疋九品三十疋從者
加一等皇親諸親准品等禮儀置頓營幕使各賜物一
百段副使八十段判官及修定儀注官減三分之二行
所州縣刺史上佐縣令等各准行從官與賜其給賜人
應兩處以上者從一多給唯有廟官之賜聽兼給謁廟

有所修造專當官及當頓官始末不絕者各賜一半上
考知頓州各免一年租及地稅傍州緣頓供承者亦准
此行事齋卽及權補充者各賜物十段升階者各賜物
十五段三衛飛騎萬騎并仗內無品人等賜五段十月
正蕃衛士等各賜三段緣道路及置營幕損百姓麥苗
者宜令州縣檢量優還價直餘應得而制書缺載者所
司類例以聞


開元六年十二月

親享九廟制

崇建宗廟禮之大者聿追孝享德莫至焉今宗以立尊
親無遷序永惟嚴配致用黝潔棟宇式崇裸奠斯授顧
茲薄德獲承裡祀不躬不親曷展誠敬宜用八月十九

日祇見九室

開元十一年五月



唐大詔令集卷七十五

欽定四庫全書

史部

唐大詔令集卷七十六
九至

詳校官編修臣范來宗

編修臣裴謙覆勘

總校官編修臣倉聖脉

校對官助教臣羅萬選

膳錄監生臣劉家瑛

欽定四庫全書

唐大詔令集卷七十六

宋 宋敏求 編

典禮

省侍

元和元年正月輟朝侍膳勅

元和十一年皇太后寢疾權不聽政勅

大中元年積慶皇后寢疾權不聽政勅

大中二年太皇太后寢疾權不聽政勅

咸通六年太皇太后寢疾權不聽政勅

服紀

代宗再行期服詔

義安太后服制勅

陵寢上

營卜

九峻山卜陵詔

充奉

厚奉建陵詔

大行太后山陵修奉事勅

扈從靈駕

太祖允百官表請不親至山陵詔

隨靈駕赴陵所詔

親至和陵勅

答百僚不赴陵勅

省侍

元和元年輟朝侍膳勅

勅朕聞為子之道莫大於寧親順色之方必先於養志
此文王之孝曾氏之心每聆遺風常所景行伏以太上
皇帝怡神間館追想大庭將以保靜延休滌慮寧體初
陽變候舊恙憊和寢食之間有不安節夙夜憂灼豈遑
寧居而內奉庭闈冀承安否嘗藥視膳且不暇於衣冠
一日萬幾固有虧於聽覽庶政關決遂闕躬親恐中外

具寮未悉予志起今月十八日以後權不聽政故茲宣

示當體朕懷

正月

元和十一年皇太后寢疾權不聽政勅

朕聞事親之禮問安雖限於晨昏為子之心就養在勤
於左右斯實虞帝明訓周王遺風朕率而行之不敢有
墜伏以皇太后母臨萬國子惠兆人存神保和養素全
道屬韶陽改候濡露感恩舊恙有加常膳頃減夙夜惶
惕不知所寧今當專奉庭闈躬嘗藥餌脫冠解帶且無

暇於寢興負宸臨軒安能親於聽斷起今月三日以後
權不聽政故茲宣示宜體朕懷 三月

大中元年積慶皇太后寢疾權不聽政勅

門下朕聞恭孝之道人倫大經省奉之儀臣節攸重况
發自誠恪稽諸典謨庶叶禮文式遵前憲伏以積慶殿
皇太后坤元降秀皇極居尊道冠母臨訓彰壺職屬時
當濡露感切於孝思氣爽保和恙生於寒暑自春歷夏
有加無瘳焦憂匪遑旦夕增灼豈尚安於聽斷且欲專

於候問恐中外具寮未諒予意起今月十四日以後權
不聽政故茲宣示宜體朕懷

四月

大中二年太皇太后寢疾權不聽政勅

勅麟孝發乎因心服勤於遺體周典著問安之範戴經
存就養之文垂為格言式示達禮惟朕小子敢廢前修
伏以太皇太后母臨六宮子育羣品清淨養性恬和保
神屬時暑小侵違裕不安寢膳未復憂灼靡寧日欲親
於藥餌情豈安於聽斷凡有事務且委司存恐中外具

寮未悉予意起今月二十日以後權不聽政故茲宣示

宜體朕懷

五月

咸通六年太皇太后寢疾權不聽政勅

門下朕聞孝養之道發於因心誠敬之文著在前典平
居以問安自慰寢疾則省侍宜專太皇太后玉衣兆祥
瑤濟啟聖母儀天下德被寰中春秋既高飲酒微減朕
親自迎奉移居永安期宿恙就平勿藥有喜而精誠未
感良醫無效情方切於焦憂政豈遑於聽斷日須躬問

以冀平和恐中外具寮未諒予意起今月三十日以後
權不聽政故茲宣示宜體朕懷

十一月

紀服

代宗行再朞服詔

三年之喪天下達禮苟或變革何以教人朕遭此憫凶
攀號罔極公卿固請俾聽朝暮斬焉縗絰痛費心靈豈
可更議公除便移諒闇昨見所司儀注以今月十三日
大祥十五日從吉仰憑遺旨又欲抑予切惟哀荒深謂

未可其百寮並宜以此日釋服朕將此武丁之道成素冠之詩恭守再周不忍權釋凡厥在位宜悉哀懷

羣臣三表

請公除從

義安太后服制勅

皇帝為義安皇太后制服重輕事

權知禮部侍郎陳商等狀伏觀義安皇太后喪皇帝三日而聽政十三日小祥二十五日大祥二十七日釋服者皇帝遵奉遺旨將欲施行臣等商量事貴得

中禮從順變伏以宣懿太后常奉太皇太后之令追尊徽名附配廟室今云議禮合有等差伏請皇帝降服朞周行以日易月之制十三日釋服其內外臣寮便以其日除釋至於所奉陵寢制度法物事以上即請准舊例無更降授謹具如前公卿等議大行皇太后喪禮狀

中書門下奏今月十一日大行皇太后遺令十三日小祥二十五日大祥二十七日除服者伏見陛下以

因心之孝弘博愛之仁輟視萬機形於四海非臣等
愚淺敢窺聖德然酌於羣議恐未得中伏思殷周之
禮年代古遠史傳所記簡而未詳自兩漢以降文籍
大備未有兄弟相友三葉重光如聖朝之禮所以母
后之制罕聞故事考禮經之訓時為大體次之順次
之稱次之宜次之臣等奉太皇太后令已命宣懿太
后升祔禰宮昭配之禮既存令典尊親之義必在正
名皇帝服宜有所降期年之制羣臣隨君而服亦從

降禮其山陵制度及禮儀法物並如太皇后故事一
無所降雖屈已申情陛下動循於禮法而酌宜定制
羣臣難抑於義心伏希聖明必賜察納謹具如前

勅朕恭承遺令既遵易月之文而公卿庶寮願舉酌中
之典徵引古義發揮舊章閱茲數陳良用酸惻朕嗣續
鴻業豈以自私勉副羣情倍深感切所請降服及山陵

制度並依

會昌五年正月十五日

陵寢上

營卜

九峻山卜陵詔

夫生者天地之大德壽者修短之常數故生有七尺之形壽以百齡為限含靈稟氣莫不同焉皆得之於自然不可以分企也雖復迴天轉日之力盡妙窮神之智生必有終皆不能免是以禮記云君即位而為禋莊周云勞我以形息我以死聖人之至鑒通賢之深識著之典誥貽之話言顯說正詞曾無隱諱末代以來明辟蓋寡靡

不矜黃屋之尊慮白駒之過並多拘忌希慕遐齡謂雲車
易乘曦輪可駐軌同趨並其弊甚矣有隋之季海內橫
流豺狼肆暴吞噬黔首邑里凋殘鞠為丘墟朕投袂發
憤情深拯溺扶翼義師用濟塗炭賴蒼昊降鑒股肱宣
力提劍指麾天下大定氛祲清殄區宇平一反澆弊於
淳樸致王道於中和此朕之宿志於斯已畢猶恐身後
之日子子孫孫尚習流俗猶循常禮加四重之櫬伐百
祀之木勞擾百姓崇厚墳陵今預為此制務從儉約於

九峻之山足容一棺而已積以歲月漸以備之木馬塗車土椁輦簾事合古典不為世用又佐命功臣義深舟楫或定謀帷幄或身摧行陣同濟艱危克成鴻業追念在昔何日忘之使逝者無知咸歸寂寞若瑩魂有識還如疇曩居止相望不亦善乎漢代時使將相陪陵又給以東園秘器篤送終之義恩意深厚古人之志豈異我哉自今以後功臣密戚及德業尤著如有薨亡宜賜塋地一所賜以秘器使窆時喪事無關所司依此營備

稱朕意焉

貞觀十年二月

充奉

厚奉建陵詔

人子之道存乎色養穹蒼不德鉅創誠深朕觸目哀荒
攀號無計終天永訣先遠有期欲報之心不任罔極務
崇兆宅庶竭哀懷應緣山陵監護鹵簿等事宜令有司
備具厚禮不得節減盡庫之所有成遷厝之大儀公卿
百寮宜悉朕意

大行太后山陵修奉事勅

蓋聞天地至德常存煦育之仁皇王大孝克念述遵之
義朕纂承丕構每務躬行而釁禍相延再罹災疾大行
太后慈順永遠仙馭莫追遺旨丁寧俾親庶政祇奉號
咽不知所措緬懷風樹之感俯追龜筮之期以復土方
興役車未已慮失農桑之候或貽凍餒之憂惻然憫傷
思獲均濟緣山陵所要車牛夫役等除官中自有外並
須和雇仍先折本戶夏稅錢訖度支以不折估疋段充

填如本戶所折稅錢已盡即所司給付無令損折仍委
山陵使與所司切加勾當不得輒令侵欺

元和十一年三月

扈從靈駕

太祖允百官表請不親至山陵詔

朕永懷罔極實願匍匐園陵今汝等既以宗社事重固
相敦迫敬依所請倍增號絕

隨靈駕赴陵所詔

伏以山靈卜兆追號罔極日月遄流先遠將至且如追

慕之痛感在因心終天之喪思遵達禮來月十一日靈駕發引朕侍從親赴陵所宜令有司隨事供擬

親至和陵勅

勅朕祗荷丕圖惟仰先訓方追號弓之痛俯臨同軌之期將展孝思宜親營護皇太后義深鳴鳳情極攀龍亦欲專奉靈輿躬及園陵寢廟務盡追推之道用終哀敬之儀其大行皇帝發引日朕當從皇太后親至陵所宜

令中書門下准此指揮

天祐二年三月

荅百僚不赴陵詔

朕以痛深創鉅園陵有期冀當復土之辰以慰終天之
報而公卿大臣敷陳典故援引今古以為一日萬機不
可斯須而曠既執禮而愈切難順情而有違深抑荼蓼
之哀懷俯徇股肱之讜議爰因晨省已啟慈順倍極摧
傷勉從來請

天祐二
年正月

唐大詔令集卷七十六